



都察院左副都御史馬公謹傳

馬謹新樂人宣德丁未進士拜貴州道監察御史正色立朝慨然以功業自期嘗巡按浙江等處所至克振風裁貪猾屏迹時大學士楊士奇輔政不輕許可知其廉介特贈之詩至以冰霜鐵石比之時以爲確論正統壬戌改吏部驗封司郎中佐尚書郭璉推授之謹不阿勢要用人悉遵常格無敢越者禮部尚書胡濙稱其臨勢力炎涼不改節操尋陞湖廣右布政司使至則敦德化剷宿弊吏民悅服時所屬多淹獄久弗決御史閻寬以謹精於法律奏同審錄辯活者

二十餘人已已苗賊生發攻圍城寨殺虜官軍廷推
謹練歷多謀特勅同叅將張某御史侯爵往總軍事
督糧餉衆議分兵悉剿殺之謹曰苗之叛逆非苗罪
也實有司橫斂所致若盡殺之未免玉石不分徒傷
國家好生之德盍先傳榜申諭有能降者安輯之彼
貧固弗庭然後分兵討之未晚衆皆稱善及期諭之
來降者數千人分布郡縣給賑之各得其所其冥頑
不服者乃督兵由沅州綏寧等處四出截殺攻破淇
溪等寨斬首百餘級奪回被虜男婦三百有奇頭畜
千餘景泰庚午仍督官軍攻破臘婆等洞大小千餘
寨斬首四百有奇奪回被虜男婦三十有六頭畜倍
乏已而青龍渡楊山等處賊猖獗朝廷特檄謹同叅
將李震等由塘口進奪浪江青龍渡馬楊山等處破
賊生擒五人斬首五百三十有奇追至雞心嶺等處
報石壁等寨賊乘隙出掠又與震等直搗賊巢賊恃
險拒敵遂督衆奮擊擒獲二百餘人斬首千餘旣山
東寇復出仍督官兵追殺擒獲四人斬首十餘捷聞
特賜獎賚辛未春武岡城溪平水小言臘鳥等處賊
通廣西蠻寇圍聚青肺山頭硬寨僭立龍鳳黃旗衆

方患之謹謂震曰今用兵累勝勢同破竹苟玩愒歲月則刃鈍節堅進不可得也於是督兵攻破賊寨死者無算擒獲賊徒楊光拳等五百六十餘人斬首倍之他扶城等寨聞風悉降先後奪回被虜男婦俱給規完聚乃班師當時會議平苗之功蓋與震等同冒鋒鏑而其運謀之功則謹居多旋轉左布政使陞都察院左副都御史巡撫河南奏覈所屬官吏凡貪墨無狀者悉黜罷之務愜公論遽以老乞致仕許之居家十有餘年惟課子孫耕讀而已尚書王恭毅稱其孝友廉靜爲進士時父母沒哀毀踰禮自負土爲墳以葬友兄弟甚厚家產悉以歸之居官俸祿外秋毫不取於人可謂古之良臣矣

都察院右副都御史孫曰良傳

實錄

孫曰良字良齋江西豐城縣人永樂辛卯進士授監察御史時朝廷初復安南地欲得老成有風力者安集其民陞知交州府居藩服下民夷雜處尤爲難治曰良治甚有聲正統初超陞廣西右布政使後丁外艱詔起總督廣西兵備未幾丁內艱以北虜入寇起復陞右副都御史鎮守臨清景泰二年以疾乞致仕弗得乃舉都御史韓雍李匡輩十人自代章三上許之居家凡二十三年成化十年八月卒年八十七計聞賜祭葬如例曰良豁達有雅度與物無競歷官中

外所至有惠愛及人隱然有古循吏風自奉薄而急於義俸祿餘資恒以散宗戚之貧者家居足跡不一至公府鄉人賢之

嘉議大夫都察院右副都御史芮公釗行狀

韓雍

公諱釗字宗遠姓芮氏其先應天溧陽人曾祖諱宏甫祖諱仲瑀世有隱德父諱琦徙家順天寶坻好禮尚義鄉稱善人母陳氏有賢行公自幼天性警穎父母口授以書卽成誦稍長遣游邑庠讀書績文大有造詣正統戊午京闈鄉薦明年會試禮部中乙榜例當授校官公不屑就卒業太學壬戌登進士觀政都察院維時憲綱新進初任不得授御史而掌臺事者亦剛嚴少許可然見公姿宇魁梧風裁凜凜不能不

屬意廼登諸進士試刑書月再試公每列上第掌臺
事者深器重已而朝廷以御史清要之官不可以他
途雜進亦注意進士臺憲因入奏考選進士二十有
四人爲御史兩京公在首選爲河南道授承事郎河
南道分隸皆劇司且司考覈京師郎署以下及畿內
百職事未幾公掌道事刑政清肅考察明允他道缺
御史守篆者亦付公兼理一時聲名籍籍動朝野甲
子奉 命按治遼東旣歸復按河南所至風稜峻整
憲紀修飭鋤強擊貪不少寬假將吏士民畏之如神
明貪墨吏有望風解印綬去者已而復按治江西江

西地大民衆詞訟填委素稱難治公至布條章謹約
束抑強扶弱令行禁止於是境內大治吏民畏威而
懷德嘖嘖稱頌以爲前此所未有旣代歸人皆眷戀
不忍捨未幾朝廷知江西之人思公不能置遂拜公
江西按察司副使公至部凡所激揚繩糾有加於前
聲聞益大振辛未以外艱去位江西十三郡之人羣
訴於按部使欲公奪情以圖終惠按部使以聞值禁
例不果遂得終制甲戌陝西右布政使闕員天官以
關中地重民夥且供餉三邊承宣之官非素有才望
者不克稱廼薦公於朝往蒞厥官公夙夜孜孜區畫

撫綏邊儲充足民庶安止一時論天下賢方伯必以
公爲首稱明年進左布政使德政益修人無間言天
順丁丑 今上復大位慎選臺憲且以整飭邊備非
臺臣不可遂召公入朝拜嘉議大夫都察院右副都
御史食從二品祿授以璽書命巡撫甘肅公至鎮感
上知遇勞心焦思知無不爲勤練習謹斥埃精器
械廣儲畜分兵禦要害而復籌兵民利害而罷行之
灼將吏勇怯言於朝而進退之武備大修百度咸貞
邊人愛戴而畏服雖古名方鎮莫或過之庚子丁陳
孺人憂朝廷重邊計命公奔喪歸且遣官賜葬祭襄

事畢還鎮辛巳虜酋宇來悉衆寇涼州公提兵突入
涼州嚴守備與虜相持時出奇兵戰虜或踐蹂虜營
斬獲甚衆虜驚不敢近復分其部落寇莊浪甘肅諸
道路梗塞人情憂疑公隨機應變分兵勦襲所向克
捷虜輒遁走凡虜出沒諸處幾一載而城守無虞兵
威不挫虜卒氣索奔北致數千里之境廓然清寧論
者以公運謀鼓勇經略指示之功居多朝廷方行報
功之典而公不起矣壬午九月三日也中貴總戎歸
其裝惟衣冠簿書而無纖介私物衆莫不服公之操
守不可得計聞 上爲悼惜特給驛以行旣至復遣

官祭及管葬事年五十有五雍與公生同郡舉進士
同年觀政都臺同道拜御史同日後奉使於外數同
處茲復同進位都臺且心同道同知公行誼識莫予
若也然以公之才之德天下士大夫如雍之相知者
方期公握臺章登卿輔以大厥施而公竟止於斯豈
非命哉用杖泪錄公行實之槩伺名筆据而採焉謹
狀

都察院左副都御史宋傑傳

實錄

宋傑直隸定興縣人登進士授兵科給事中陞光祿
寺少卿進陝西左布政使擢左副都御史叅贊甘肅
軍務天順元年左遷山東右叅政改湖廣尋陞右布
政使成化初仍左副都御史巡撫蘇松等府未幾致
仕成化十年四月卒計聞賜祭葬如例傑性和厚質
實而量有容景泰中御史多暴橫傑在甘肅有巡按
者見之不下轎傑略不介意在浙西行其無事人以
鎮靜稱之蓋平生履歷雖無能名亦無怨聲不失爲
君子云

都察院右副都御史除名徙開平汪公浩墓志

銘

彭華

公諱浩字弘初姓汪氏其先蒲圻人大父諱必通元季避兵石首因家焉父諱性母周氏生七男子公其長也公生而穎異正統鄉試第三人少保楊文定公愛重之延置家塾遂卒業於其門下景泰辛未登進士拜南京大理寺副日夜窮竟律意且平反成案卽得法家要領有所駁正兩法司無不帖服三年績最推封及父母妻天順庚辰陞四川按察司僉事蜀山川險絕民夷雜居多盜有司畏懦莫敢問且幸

朝廷遠聲息不朝夕聞相與欺謾冀盜飽且散則已
前後踵襲爲故常公奮曰吾輩受朝廷付託乃恬然
坐視羣盜爲民蠹賊不自愧邪因選官軍募民壯躬
擐甲胄與出入險阻捕斬之天澗溝賊悟昇花溪賊
陳貫章鐵鑛壩賊田法勝連山河賊黃鷓子引類扇
黨肆荼毒多者至數千人悉以次就擒公自是名藉
藉甲申以事至京師朝議四川多事非公巡撫不可
上從之擢公爲都察院右僉都御史賜璽書以往
適什泉賊趙鐸烏合五千餘人爲亂放兵四劫燒燬
州縣殺都督何洪及指揮揚英等聲勢張甚公至布

國家恩威申賞罰之令身先士卒冒死履險竟滅之
未幾戎縣大壩苗蠻又相扇起朝廷謂不一大屠剪
蜀賊終不畏乃命襄城伯李公瑾兵部尚書程公信
征之二公至旁詢下訪咸謂賊據山寨路險峻不可
到萬口并爲一談已而問及公公慷慨言曰此賊恃
險阻爲惡今大將率天兵至若不破賊賊猖獗將何
如請爲公以身任之於是指畫路途散騎軍銜枚潛
跡攀緣魚貫而進約之賊寨所一時舉砲火向賊金
鼓聲震山谷賊不意官軍猝至相顧錯愕盡棄累重
散走遂縱火燒賊三百餘寨賊或死或就縛或逃匿

絕蹤影不敢出乃招徠流離饑寒者安輯之使得所
公於是役功居多成化戊子以功遷右副都御史公
感激益奮勵圖報稱銳意振紀綱鋤荒蕪越明年廉
得鎮蜀都督芮成貪懦狀具以聞成亦許奏公命廷
臣往驗訊成贓以千百計於功絕無所得第坐公因
公掠殺人及擅伐材木遂被逮廷鞫同成謫戍開平
在邊數年或言公功足以贖過宜復用上亦察其
寃士大夫方顛顛望公復起而公竟以病不起矣公
胷次闊略不拘小節而有風力敢任事事在已直前
勇爲之一切身之利害不恤其及於禍卒以此云

都察院右副都御史彭誼傳

實錄

巡撫遼東都察院右副都御史彭誼字景宜廣東東
莞縣人由舉鄉試工部司務遷監察御史督修張秋
有功加六品俸從都御史王文平劇盜擢大理右寺
丞進僉都御史提督紫荆倒馬等關以忤權貴左遷
紹興知府九載秩滿陞山東左布政使遷工部右侍
郎尋改右副都御史巡撫遼東八年凡四上疏請老
上乃許之家居二十餘年以詔例進階弘治十年
九月卒賜葬祭如例誼好古博學於律歷占象水利
兵法之言尤所留意平居謙厚簡默若無所能者而

虞徵錄 卷之六
臨事毅然有斷爲司務嘗與尚書辯論曲直人稱其
鯁介在紹興多惠政均耗糧以利轉輸築河隄以捍
水患民甚便之及鎮遼東軍令振肅數擒斬首虜所
建立後多可法至於急流勇退尤人所難云

都察院右副都御史畢公亨神道碑 丘濬

正議大夫資治尹都察院右副都御史畢公致仕家
居以弘治元年六月十六日卒於洛陽里第有司以
聞 上賜諭祭遣官營葬事如故事公諱亨字文康
畢之先出周文王第十五子畢公高洛陽之畢來自
單父國朝洪武初從戎於洛故今爲洛陽人曾祖諱
均用仕元爲千戶祖諱山始居洛陽洪武末以從征
隸都帥平安部下歿於陳父諱山隱德弗顯祖父皆
以公貴贈應天府府尹公生戎伍間穎然超出羣類
自幼雅志讀書會朝廷有軍衛子弟入學之例公首

先入河南郡庠充弟子員從師受經爲舉子業在儕輩中條然玉立操筆作爲文辭多造道語時廬陵歐陽哲以按察副使督河南學政得公文讀之甚喜每試寘優等所至輒稱之以勵學者正統丁卯果以易中河南鄉試第三主司錄其文刻之明年試禮部下第卒業大學得以交遊天下士於是學問益進辛未再試又不利歲甲戌始登進士第除南京陝西道御史時都御史軒公輓方掌南臺事兼督京儲性剛介人少當其意者獨倚任公委以錢穀之任公盡心清理宿弊頓革及凡諸道有疑獄一以付公公片言之

間立以剖決一時聲譽翕然以起歲壬午陞福州府知府府臨以三司事煩劇而民健訟衆謂公中州人而於閩南民俗非所素諳公蒞事區處斷決咸得其宜如素習然者衆咸畏服閩藩歲造段匹聽民自辨往往以造作不如法累及二司公曰百工居肆以成其事乃設織造局於府門之右時加檢視用是所費如故而精緻中程度舊例驛傳馬每疋率用民糧數百石然所得皆羸弱未久卽斃公痛革其弊價減其半而馬得其良數歲乃一易民甚便之凡所施爲必爲經久之計閩中八郡稱良守者以公爲首廉能之

聲聞於遠邇歲甲申適應天府府尹缺員天官卿曰
莫如畢亨者乃以公應命輦轂之下俗雜五方尤難
於治且舊京百司所在凡有營爲必責於有司徵求
無虛日公一以公心應之非理者一切拒絕在任七
年一以省事節費爲先歲終計二縣所費比前政減
十之三四民不受害而官事亦不廢歲壬辰有都憲
之命奉璽書巡撫江南兼督淞西財賦自周文襄公
後至是餘二十年八易其人矣蓋淞西民俗浮靡士
風囂薄人惟利已而不恤公事事一不如意輒作無
名詩騰謗當道者不及察故用者不三四年輒罷去

公至究心經制一應賦斂征調率循公道以行凡欲
舉一事輒問曰舊比如何如此得無虧於官損於民
乎必須官得其用民不受害然後行之有以私意相
干者雖不行亦以善辭遣之不激不隨人謂自文襄
後惟公稍得其微權餘意然時移事變終不能以盡
如其志公年五十五卽上章乞致仕有旨畢享年未
衰老不允致仕宜用心巡撫明年又上章 上以其
詞懇切特從其請公歸於洛河之濱買田數畝偶得
司馬溫公獨樂園故址公曰文正公大賢君子故獨
樂其樂吾安敢獨有其樂哉盍與衆共之乃與洛中

耆舊十數人做古人結真率會朔望相與樂遊其間
命之曰水南樂處如故事飲酒以醉爲節高歌投壺
賦詩論文抵暮方還後公得風疾遇會日亦力疾肩
輿往會談笑自如無異平時公在官時自奉儉約致
仕家居無良田大屋凶年不免日食不給然處之晏
如也至是卒年六十有九公爲人質實洞達矢口見
心不爲城府事諸兄盡友弟之禮與人交久而不懈
善詩文不事雕刻所著有復齋小稿六卷省愆雜錄
四卷奏議一卷藏于家

都察院右副都御史雷復傳

實錄

雷復字景陽湖廣寧遠縣人正統丙辰進士改庶吉
士授行人擢監察御史歷陞廣西按察副使浙江叅
政山東布政使召拜禮部右侍郎改右副都御史巡
撫山西邊關成化十年五月卒於官賜祭葬如例復
清雅端謹歷任中外所至守法度循矩矱無非分之
爲侍朝未久以短於敷奏出外然在邊行事多得人
心故至今思之

都察院右副都御史楊璿

實錄

楊璿字叔璣直隸無錫縣人正統己未進士授戶部主事遷郎中山西右布政陝西右布政使河南政使母喪服闋進戶部右侍郎尋改右副都御史撫治荆襄流民巡北直隸節制永平山海居庸等邊關巡撫河南成化十年四月卒于官賜葬祭璿通敏有操執與人不苟合家素豐裕而自奉甚儉約治官如治家惟其是不擇利害爲趨舍其在山西定民差役在荆襄區處流民在京畿賑濟饑民事皆得宜而無弊旣沒餘十年士夫談者猶嗟悼云

嘉議大夫都察院右副都御史夏公墳墓志銘

謝鐸

成化己亥秋九月都察院右副都御史天台夏公卒於家於是公年五十有四而致其政已五年矣方公之力致其政以歸也天下想聞其風采以爲有若公者蓋四方以其進爲榮至老於官而不倦官愈尊而退愈難若公者進退輕重於世何如哉公景泰中以進士起家爲御史出按廣西首除奸貪息盜賊通錢幣民皆便之尋歷福建興革黜陟一如廣西時而其於江西也風裁益甚中貴人葉達怙勢衆莫之敢撓

公累章劾之落其權天順用薦者擢廣東按察使廣東有師旅之命守城兵不足取之民公曰誰獨無父母妻子而使人舍其親以捍人之親奚罪哉民皆感泣而去曰公活我也既凱旋都御史韓公雍將侈爲燕樂公亟止之曰出師以爲民也今師以病民可乎韓不能難成化初擢布政使尋徙江西江西人亟稱之未幾遂擢都察院右副都御史巡撫四川四川夷獠歲多劇寇公至以小羊兒捷聞上寵賚之公益爲盡心立互知會捕法賊得以不熾古州苗以萬數徙居爛土幾年矣有仇播州宣慰者誣爲盜引將逐之公亟奏曰制馭苗蠻當如虎狼其靜也若棄而不使懷疑其動也必鬪之而不使爲患今靜而故使之動何哉松叅將請益兵公曰將不在兵兵不在衆乃揀精銳四千八百人往更之而一無所增巡撫例得議事公條六事以聞曰嚴責成以馭將威遠慎舉措以修政安民權事宜以防奸制變度煩簡以隨材授任重將權以馭寇安邊設官攢以典司出納大抵皆疆圉計也既乃意有所不合輒引病歸章三四上上留之卒不可得曰知足不辱吾豈敢終負吾心哉及歸杜門養親有造之者雖數不報曰吾以病故棄

國事何能復修主客禮也至是以病卒公諱墳字宗成族出會稽在天台代有顯者高祖圭孫曾祖應剛俱以從祖廸之貴贈都察院左副都御史祖進有隱德父大愚封廣東道監察御史母丁氏封孺人娶盧氏如母封

通議大夫都察院右副都御史李公浩神道碑

銘

丘濬

公諱浩字德廣安陸人也正統丁卯以太學生釋褐擢兵科給事中公儀觀偉甚挺然侍從中上御朝恒目之退詢諸左右曰西三科給事中有偉而秀者誰耶對者曰覃浩也上自是有意大用之未幾南京工部右侍郎缺員吏部以聞內批出覃浩可公自釋褐至是甫三年卽階六卿之亞朝野傳誦歆羨謂數十年來所未有也公亦自以遭際聖明以太學生卽擢近侍未幾卽拜卿佐思所以圖報稱者夙夜

孳孳不少怠在兵科時適天下多事日與其僚采同心訪求天下軍民利病邊防要害機宜聯名進章疏多爲時所採用及蒞南部部中與內官監同事凡朝廷有所營造繕修其事委於內臣工作材料則責成於部公一一處置咸得其宜尋奉璽書專理南畿糧儲公會計其多寡贏縮之數使之通融出入宿弊一清兼理江北屯田時蝗大作檄郡邑驅捕之蝗羣棲蒲葦間爲水所沒時人歸其功於公曰積誠所感也天順改元公以例遷貴州左叅政尋改河南未幾陞貴州左布政使適苗蠻不靖時出爲邊患朝廷擬遣

大臣安撫之時議以公在貴久得其要領以公名聞於是有都憲之命苗人聞公奉璽書來撫之室家相慶咸革心向化會四川大壩夷肆侵掠朝廷命大將勦之公統雲貴兵自貴境入與大軍會所向克捷賊平以功進二品俸衆方望其大有爲公遽以老上章乞骸骨歸矣家居者餘十年卒享年七十有二時成化丁酉閏二月也計聞 上賜祭一壇先是公先世李姓贅覃氏因冒其姓及公顯復氏李或曰李隸尺籍公獨不爲子孫遠慮乎公曰尺籍吾家固有也姓與生俱生欲爲子孫避患而舍吾祖所受之姓可乎

卒復之故卒氏李云公生秀穎異常兒弱冠補州庠
弟子員日誦千數百言專門戴氏禮父嘗病疽醫莫
效公口吮之而愈自幼爲人有執守不肯妄取予於
人在太學時嘗往後湖稽版籍宣城人有饋白金六
十兩者公爲白其事而不受其報自其未遇時已能
卓卓自立如此誠宜見知人主一旦超擢如此之峻
也古所謂奇男子者非耶

都察院右副都御史婁良傳

實錄

婁良字至善河南通許縣人正統乙丑進士初授主
事累陞至郎中景泰間陞廣西右叅政專理邊務入
順間轉督涼州饋餉兼管屯田成化初擢陝西右布
政使進右副都御史巡撫甘肅地方尋乞致仕成化
二十一年十一月卒年七十五計聞賜祭葬如例良
謹約自守居官不爲已甚歸日行李蕭然

都察院右副都御史孫洪傳

實錄

都察院右副都御史孫洪字伯大山東昌邑縣人景泰五年進士授兵部主事遷郎中丁憂服闋改禮部成化間歷陞河南右叅政左右布政使遷右副都御史巡撫大同以威寧海子之捷進左副都御史食正二品俸進右副都御史巡撫河南後爲周府儀賓劉宣所訐奏下詔獄尋命致仕去弘治元年五月卒洪負幹局爲叅政時以贊書撫治流民有勞巡撫河南奏停王府造作蠲逋負浚滏河以興水利人頗稱之其爲儀賓所奏亦王府怨之而致是蓋非其罪云

都察院左副都御史盛公頤墓志銘 丘濬

英廟復辟之初權臣之冒功者朋比爲奸鑿空起邊
釁欲樹奇功以蓋其迹率師闖塞卽還虜因乘之而
入十三道御史欲有言同事有洩之者彼先入愬于

上誣御史中有與被繫內臣張永同族者欲爲之
報復以激 上怒卽逮所誣御史下獄明日衆御史

章始上 上御便殿召衆入盛氣待之擲章付御史
誦之誦至半 上曰止擲章中所條事折之令其分

疏復論之以終誦 上意稍悟然重違權臣意姑從

輕典凡列名者俱調外任其一人錫山盛公也時掌

河南道事出知保定之東鹿縣先是權臣啓邊釁其勢
勢談可畏人無敢言者公首與同官涑水張公鵬謀
謂事干軍國烏可畏禍而不言張公以爲然卽入謀
之兵科都給事中王鉉約以章交上機事因之而泄
時聯官者皆未知也亟召入永平周公賓倉卒誦所
上章音吐洪亮略無阻滯及對上之言詞直理正
天下聞而壯之而不知首啓其謀者盛公也同日出
補外者若干人其後惟盛公年最高官最顯而能以
令德終嗚呼天於忠直之報固獨厚之邪公諱顥字
時望常之無錫人正統辛酉得僑京闈景泰辛未始

登進士第首擢河南道監察御史尋以老成掌道事
時初經已巳之變朝廷懲前政委靡之失稍開言路
一時言事者毛舉細故攻訐陰私以張直聲公獨顧
大體惜人才掩其疵疾不爲已甚善類賴之嘗兩奉
命出按治按淮時值歲大歉發倉賑貧全活者甚衆
按閩時適當大比拔賢振滯是科得人爲盛及是首
謀摧折巨奸直聲凜凜聞天下其知東鹿也邑多顯
宦往往怙勢爲不法聞公至相戒曰是嘗劾奏石總
兵者其人不可犯也公變搏擊以爲撫循吏畏而民
安之未幾丁內艱去民留之不可俟其服闋相率詣

闕乞公公得再任不復用刑法有爭訟者諭之以理
輒叩首聽受不復辯隣邑聞之訟多年不決者各來
請判於公公折以片言各心服而去時人有清如水
明如鏡之謠邑介真保間四境之民雖非所治亦聞
風趨赴郊外有隙地願就者自然聚以成市邑人因
目爲清官店旣去任民築亭爲立去思碑至今存焉
歲甲申擢守邵武行所無事不動聲色而郡民大悅
旣而巡撫都憲以延平民狡而事繁請於朝移公治
之延平與邵隣聞公政聲有素莫不革心向化巡按
御史錄公兩郡政績請旌異於朝進一階封贈父母

及妻歲癸巳陞廣西叅政專督糧餉丙申陞雲南右
布政使丁外艱服闋改陝西公在廣西當殘破之餘
委曲措注民夷賴以不擾陝西地臨三邊公在任日
邊報無虛月適歲多歉公調度有方而餽餉不缺入
爲刑部右侍郎佐其長以明允恒舉歐陽公求生不
得則死無憾之語爲僚屬告有深文巧詆者輒不樂
之刑用是平僅再閱歲調公南京蓋當道者之鄉人
有欲得公處者或以爲言公曰吾南人往官於南固
其所也明年山東旱饑盜賊將乘之而起廷議欲遣
大臣巡撫僉曰無如盛時望者改公都察院左副都

御史乘驛往命至公卽日就道甫下車露禱於天雨
卽大注枯槁復蘇公多方設法凡前人救荒之政於
今有益者次第舉行而又因時之宜條數十策行下
所司民賴以濟賑恤之餘所儲尚百餘萬又有餘力
以及於前代聖賢有功齊魯者爲之建祠宇以報祀
之公山東之政大抵以黜貪暴表忠良除苛政以固
民心爲本在山東者三年齊俗翕然以變年近七十
以老疾上章乞致仕 上以其情詞懇切從之馳驛
歸至徐州適所部有大獄以公知其始末有旨命鞠
之獄成後歸公自家食時家事一以付其弟願至是
抵家伯仲怡怡友愛加篤公家事一不問願爲之構
方塘書院壘山鑿池蒔花植竹以爲娛老之地公時
靜坐一室焚香讀書以自適泊如也歲丁未以上
皇太后徽號恩進公一階家居六閱寒暑以歲壬子
正月卒享年七十有五計聞賜葬祭如例

都察院右副都御史魯公能墓志銘 尹直

都察院右副都御史魯公奉勅巡撫甘肅也甫下車
卽嚴明號令簡閱伍振張領目補剔利弊兵備咸
飭聲威遠著虜寇不敢南牧朝廷可無西顧之憂矣
無何遽聞父喪請歸守制屬邊務方殷代者不至弗
敢輒離日墨衰從事摧毀勞勩形神瘠耗疾作不可
治卒於關內道之公館實成化丙午八月十日也有
司斂襲如禮歸其喪計聞上深悼惜遣官諭祭命
有司治塋域卹典厚矣公諱能字千之姓魯氏世居
寧國涇縣曾祖通寶洪武初以民兵守禦宣州有功

陞總旗十七年調廣東新會縣守禦千戶所子孫遂
爲新會人祖諱保輓考諱真號素軒先生以公員累
封戶部員外郎妣周氏繼母陳氏俱宜人公資質端
重性敏慧嗜學素軒喜曰吾世武弁以儒業起家必
是子也遂遣從經師遊年十六選補邑庠弟子員景
泰庚午領鄉薦甲戌登進士高第觀政冬曹時永興
王薨公奉命營葬事提督有方事如期集還朝除南
京戶部四川司主事天順戊寅丁周宜人憂辛巳服
闋改戶部山西司成化丙戌陞員外郎明年以繼母
喪去官辛卯起復改江西司壬辰考最給誥推封如

制尋陞湖廣司郎中癸巳遷陝西布政司右叅議戊
戌進右叅政庚子陞右布政使尋轉左使甲辰陞都
察院右副都御史巡撫甘肅公歷戶部曹務繁劇區
畫綜理嚴密而均適國用以舒司徒多倚重之在陝
藩時分守臨鞏二府清水縣城久圯虜寇卒至公親
率官民兵且築且戰城成虜自遁去繼奉璽書總理
八郡三邊糧餉都行二司屯種徵運以時遠近有等
而民力不疲每歲戶部給糴米銀數十萬兩舊多乾
沒於權要公估直分糴龠合無虧而兵食以足創會
計堂一所於公堂之左凡民徭邊儲洎王府祿米所

當預計者則集僚佐疇度其中務在均節官民兩便故歲雖侵無稽逋甲辰陝右亢旱不登民相食公虔禱羣望百方區畫古今救荒之宜舉行殆盡由是多是所存活雖間至死不怨而一方卒賴以無虞公之力居多爲人溫厚坦易慎交際口不道人過失至論公事則執定見侃侃不回職所當爲鞠躬盡瘁歷官三十餘年位躋二品甘嗜淡素如布衣時蓋志在澤民安社稷而已嗚呼可不謂賢乎

都察院右副都御史馬馴傳

實錄

都察院右副都御史馬馴字德良福建長汀縣人中
正統十年進士授戶部主事遷郎中陞四川布政司
左叅政進布政使擢右副都御史巡撫湖廣致仕弘
治九年五月卒於家計聞賜祭葬如例當馴爲叅政
時分守地方適有寇亂嘗督理餉饋不缺事平受文
綺之賜繼爲布政又值時有事於播州而能給贍軍
需復被璽書褒獎至巡撫湖廣則關中饑民流食荆
襄者甚衆馴以便宜卽賑之地方遂賴以無虞後歸
老於家幾十有二年而卒

甘肅巡撫副都御史唐瑜傳

唐瑜字廷美上海人九歲失恃事繼母如所生及長美髯修幹器宇凝重時人皆異待之景泰辛未進士拜南京禮科給事中京城饑分地給食活者甚衆出知衢州府尚教緩刑民無敢欺者縣有孔氏祭田奪於民瑜以私財贖其租使供祀事孔氏子孫圖瑜像於家廟生饗之癸未旱疫爲文禱於神雨大作沴氣遂消後數旱禱輒雨民勒石紀其事李延者爲媒匿聘金粥二子以償不足又市其妻瑜聞而歎曰民窮而犯法畏法而棄妻子典守者之過也贖還之龍遊

張福狀吳氏四人而諉其事於金氏既誣服矣瑜別置於獄廉得之釋金而罪福民驚傳以爲神賦十詩以頌將去有千人詣闕借留不得老穉攀送至不能行後復立生祠及去思碑於學進湖廣叅政山西雲南布政使並有善政大臣累薦未及用或勸宜降志者瑜正色曰我一介寒士至此復何求久之陞副都御史巡撫甘肅詔使諷織細絨以充貢瑜執弗從武臣有被黜者復競爲陰中遂坐劾以去弘治壬子復故官致仕甲寅卒衢州人聞之相率來哭奠數月不絕

巡撫兩廣副都御史唐珣傳

唐珣字廷貴華亭人天順丁丑進士知合州興學勸農盜賊解散民立生祠奉之以刑部郎中知福州府時歲亢暘至之日霖雨滂沛人皆相賀或言故事當先謁藩府珣曰未成婦而先見姑嫜可乎竟先之任識者以爲得體中官汪直用事聲勢振天下有假具名號行事者所至官吏望塵屈膝珣獨察其僞將執之衆交諫不聽訊之果姦人也由是風聞四方姦黨奪氣豪僧殺人有爲之地者獄久不決珣一訊寘於法時皆快之設義冢以收無主之骸嚴焚屍之禁開

仁惠里洲日以廣民業築五虎門塘以禦海患聞人
歌之歷湖廣叅政布政使入爲順天府尹先是吳玘
以彊直罷衆謂宜少貶以避禍珣至守法如故衆亦
無以怨也遷右副都御史巡撫薊州等處以母喪歸
服闋會南蠻弗靖卽家拜右副都御史巡撫兩廣方
疾聞命卽行旣至督兵進勦破村寨崑洞百餘斬獲
萬計捷聞賜勅獎勞將大用未幾以疾卒

都察院右副都御史劉潺傳

劉潺河南安陽縣人天順丁丑進士授刑部主事歷
員外郎郎中浙江右叅議陝西右叅政四川左布政
使順天府府尹都察院右副都御史弘治元年致仕
至十八年八月卒有司以聞詔賜祭葬如例潺謹厚
不務皦察在刑部時巡撫湖廣都御史翁世資與其
屬都指揮互訐上命潺往會巡按御史焦顯案其
事比至顯欲誣致都指揮罪潺謂顯曰卽如君言國
法安在卒坐世資京師有豪家兄弟爭祖職往往重
賂勘官依違者連歲會刑部檄潺勘驗乃復賂潺潺

廣德金 卷之六十一
一
丞特白部堂事乃決時論躱之其歷藩府亦俱以廉
慎稱惟巡撫遼陽於邊務多缺責備者猶爲不滿云

都察院右副都御史謝公士元行狀

羅玘

弘治七年夏六月都察院右副都御史長樂謝公卒
於家訃聞 上詔禮部遣官祭工部遣官營葬事公
諱士元字仲仁登景泰甲戌進士官戶部雲南司主
事建昌知府歷廣信永平二府四川右叅政布政使
至今官敷歷凡三十有七年弘治庚戌年六十七以
疾請歸又四年卒公自爲童時嶄然夙出禮部廷試
皆入高等在部督通州倉首陳四弊大爲部諸老所
奇而勇於特立時與閹人敵閹不勝忿欲中傷之幸
其去而繫羣胥使織公罪不可得時崔莊敏公爲少

宰薦公於太宰王忠肅公以公才宜典郡遂以知建
昌建昌兵民錯居穿窬夜且六七發而兵官影庇不
可爬搜民大困公至以他事恐兵官皆股栗自危姦
無所伏郭内外十里不拾遺民日就饒益乃大新學
官作禮樂器立觀德亭考射禮於吳諭德夢弼購書
萬卷貯講堂新藩分司新驛屋及船郵亭如之以待
賓新城樓及櫓以戒戎新城隍廟風雲雷雨壇壝社
如之以禮神祠李先生觀墓表黃孝子譚節婦門以
風俗有圖曰敦化曰表忠曰勸學圖繫以詩摹流民
間兄弟相訟者多詩以諭之惟曾氏一詩與三圖今

盛傳於人南城民有得石像潛蒙以腐鼠置屋上鴉
羣噪而啄之去來盤旋民佯驚集其隣升屋下之以
爲神媼叟歡趨如市公取其石碎於庭而止復有巫
自魯來妖憑之言禍福如響公曰是濟人所神者今
越吾境何能爲妖謂巫由吾畏謝公吾去巫忽覺如
常女子先時民劓於僞平章之虐宣德中荆國新去
之斬吏治多姑息而無良習嚙入骨至公猶欲來飶
也懷僞券訟田宅者貫魚而來推其一人先入券初
見公卽叱曰爾何僞乃爾民驚以爲神而僚吏愕不
知何以公笑曰吾見其券年踰二紀而券之紙今式

也令吏試抱二紀前案驗紙式果然諸伺於門皆逸去比部一再饑郡民始而警然既而寂然若不知者公豫倡以俸金而富民爭開廩延糴不旬日而新穀升閉廩者十七八二佐自遠歸載酒飲其邸部使至過引諸已而善必歸之故終其任而胥隸亦不聞有所按逮者成化中大理卿夏公來考察江西列薦者四人公其一焉九載郡民詣闕上書請留陞從三品俸仍留郡諸生生祠公於學翰林學士張公爲之碑公不可撤祠踣碑比去復立在廣信年殺於建昌三二而治聲實相埒屬縣永豐舊治銀穴閼久弗發而

括人寇鍾前去後至絡繹恒數千人曳行旅以任負掠民蓄以食飲兵官素無肄而括人驍曠莫不聞皆洶洶自矜時厚公者幸公將代可去以避其鋒公曰見難而避無勇貽患於人不仁無勇不仁去將焉用之乃勒兵循靈山東並永平溪踰靈山下趨之賊聞公至佯遁而留二三爲誘謀不覺我兵皆解嚴至則不壘而休於僧寺且炊俄而我邏卒不及反自甲先出而賊伏四起呼聲動林木以筦遮公環而刺之左股爲筦所中血流洞鞞柘陽巡檢者遙呼賊曰我公也賊何敢殺天子命吏賊亦愕相視公猶裹瘡督

戰如常所俘殺甚衆得其戎首乘勝破之公遂臨穴怒曰此禍穴也築之以絕窺睨公還未嘗言戰時事入朝補永平以憂不赴服除有蜀之命當分司東川東鄉縣者荆腋陝首狡巢虎穴之鎖皆彎弓帶劍之民性於寇攘而亡命逋逃是主是徠縣凡三劫而有司依違養寇爲已地公曰盜鼠也飼貓於室而冒其足可乎於是踪跡其所出入或捕或殺至數百人盜幾盡或曰縣可徙也公曰盜畏遠乎畏有備乎卽遠百里盜有足也奈何不聽檄縣長史因舊城甃之而浚其隍戊以土兵縣得不徙而迄今亦無變建夔之

僻縣也縣官擁虛名而實掣肘於其頑噤不得以符契從事惴惴尸素以須代不則剽攻於路不立主名以恐其來代者部使置爲異域不幸往者餘五十年公具知之徑按其縣廉得其魁窮治之黨解去比他縣在蜀六年 上以全蜀非公不可乃進今官巡撫之時吐蕃生熟二虜相煽以變邊吏告急公曰比其發吾不可包荒兵法曰致人而不致於人吾用之乃托行邊繕亭障嚴斥堠選軍實若不知其爲變者虜亦幸其未暴率其醜來獻羊豕羅拜道左曰乃今見天朝大臣吾生矣公褰帷徐行命譯者揚國威武虜

一步一拜麾之去公因視邊庾虛實先是邊儲皆諸
郡稅畝以充而姦民關節盤錯名爲代輸實白著庾
硿然公稽籍以驗數命官以考實得十三萬石有奇
以紓邊饑已酉蜀大饑民流入會府日如蟻公爲廣
室於城內十餘區爲粥以食之而勤滌其穢以防疫
飲病者以藥葬死者以叢塚於東郭外給歸者以符
使得傳食以至其處豫檄州縣於其日關白之行荒
政於屬郡而日夜規畫不遑暇食所親活數萬人全
蜀以安公爲吏善應變神施鬼設不可端倪始親之
若越尋丈而揆其終卒無失尺寸遇事不顧利害必
達其志雖雷霆在上屹然不動而一言合於道雖

大賤隸必改容謝之羅一峯張東白二太史與公交
服公改過之勇建昌學成夏方伯記之以處官事如
家事嘉公眞確論也性本至孝居官兩迎父養事從
父如父疾必嘗藥以進三弟終身不析著自食俸入
弟姪主之嘗一弟女歸裝具差不敵必買諸市弟辭
不許聚食餘千指用數窘公自餼粥於堂以率而族
之不能婚喪孤不能自食貧鬻屋者公力爲之所又
若沛然有餘嘗率族有力者葬其上世凡三喪建祠
堂祀先旦望族以班見買田以祭而儲其贏以預不

虞家居嚴以有禮內外斬然無敢疾趨謦欬者非甚
疾秉炬諷誦永夜乃休尤好論兵晚亦好易作玩易
軒初號約菴老更曰拙菴曰拙吾實錄也所著有約
菴稿若干卷藏於家詠史近體三百首梓行於時予
少侍公學十年公去郡又復十年 先皇帝奄棄萬
國自蜀來復與公會同哭於闕下又四年予罹憂家
居公得請道郡郡之人空巷迓公至輿枳不可行操
豚漿橐金來餽者爭隙而入公一無所受而今年春
公壽七十郡之仕於朝者又爲文若詩爲公壽及今
又皆哭公盡哀焉嗚呼民不可劫以術使德已也
非仁者歟何感人若此用是撮其槩俟立言君子銘
之碑之傳之以爲世吏勸焉

都察院副都御史馮公俊傳

郭棐

馮俊字士彥宜山人天順庚辰進士初授刑部主事歷員外郎中折獄以仁恕聞成化己未擢福建按察司副使建寧衛指揮楊畢者席勢貴以私憾殺數十人有懼其箠楚詐死入棺以苟活一時者畢卽舉火焚之聞之上官以畢東陽學士孫多庇之民負冤者十餘年俊至廉其實具疏上其事 憲宗震怒刑畢籍沒其家閩人稱快以外艱去服闋任湖廣辰沅兵備鑿沅溪以通運道累遷副都御史巡撫四川提督松潘諸軍事鎮守總兵恃勢肆害劾罷之馬湖土官

知府安鰲殘忍不道捕之寘於法更立流官數十年夷風虐政一旦洗濯蜀人頌之有一知州故人于也嘗獻微黑數笏俊怪其重厚試之乃墨塗黃金也卽擲還幾中其面斥出之母容再見所至風采儼肅以疾卒於官行李蕭然篋中止俸銀數十兩金帶三腰而已計聞 孝廟嗟悼遣官諭祭令有司營葬焉

都察院右副都御史孫仁傳

實錄

都察院右副都御史孫仁字偉德江西新淦縣人成化五年進士授刑部主事歷員外郎郎中直隸常州府知府浙江右叅政陝西右布政使河南左布政使都察院右副都御史巡撫寧夏甫三載引疾歸弘治十二年五月卒計聞賜祭葬如例仁在刑部聽斷明決才譽甚著審錄湖廣獄囚多所平反常州舊守多以贓敗者仁自治素嚴豪強斂戢近幸有索圖籍於江南者誅求橫甚郡邑吏率望塵迎奉仁獨不爲徇其人歸譖之上被逮至中道適都御史王恕疏其

事賴以得釋其後更歷三藩巡撫寧夏邊境不擾仁
之爲人嚴厲任法遇事略不少貸故屬吏奉令唯謹
然頗乏寬厚容忍之意時論亦以此少之

都察院右副都御史王公嵩傳 朱睦㮮

王嵩字邦鎮波縣人也成化十一年進士明年授太
湖知縣丁母憂服除再授青城未幾拜監察御史嵩
恥苛察崇忠厚務持大體初按遼左遼之將領弊端
百出嵩悉爲裁正其開原鐵嶺諸衛前按遼者多不
至其地嵩盡歷之一時邊備爲之肅清繼按江右會
巨盜楊九龍者聚嘯山林日千數吉安迤南俱爲騷
動嵩處以方略不踰時而盜就擒 上聞降璽書文
綺旌之盜平又會時饑人多展轉死嵩曰救饑恤困
勢不可緩若待取勘事無及矣廼令郡縣長吏卽發

廩賑之所活甚衆弘治四年嵩遷大理右寺丞進左
右少卿指揮某母再呂不孝告法凡再告者不復訊
其犯稱寃不已嵩疑其母與人通而疾其子又據律
有父母誣告之疑遂駁之諸刑曹皆笑以爲再告無
駁者及復訊其母於囚棚下產一女翌旦舉朝聞之
咸歎服以爲不可無大理云內府匠申能格殺人法
當抵命匠迺寅緣權貴得 上旨與之辨勘者欲希
順 上意嵩獨不然迺言曰生殺予奪君上之權也
奉公執法臣下之職也匠兇殺人甚慘若生者得以
倖免死者何辜覆以爲不可 上從之由是嵩名益

著十一年擢都察院右副都御史巡撫延綏其地武
備久廢且兼鎮守貪暴嵩至頓革其弊而邊務始振
後坐西虜來犯謫叅議致仕正德中逆瑾擅政求賂
於嵩嵩弗從遂証嵩在延綏時侵尅官銀矯詔下獄
籍其家而償仍戍於鄴嵩雖爲瑾所誣而怡然自處
不以夷儉易節後四年事白瑾棄市復嵩爵而所沒
之產仍命有司給焉年八十四卒嵩生平重孝弟故
凡祀先之禮靡不誠慎兄三人嵩事之甚恭所得祖
產悉讓之

論曰余嘗覽張釋之對文帝馬驚乘輿盜竊玉環事

未嘗不掩卷而歎何也夫法者如衡之平不可以人
 主意嚮而爲之重輕今觀邦鎮公爲廷尉時平反執
 奏與釋之所對奚異使用法者皆若是則天下焉有
 冤民哉

都察院右副都御史張公誥神道碑銘

顧清

張在宋爲汴人南渡時始遷於杭再徙華亭華亭之
 張故爲著姓公之族家宦城書院西時呼爲鶴城張
 云高祖元亨曾祖天祐祖仲清並有令名晦迹田里
 考遜字時敏讀書善吟與陸夢菴潤玉王雪航公佩
 等爲詩社十友著在郡牒妣余氏有賢行實生公諱
 誥字汝欽幼而簡重不與羣兒伍少長銳志於學爲
 文章操筆輒成見者歎異以府學生領天順己卯鄉
 薦登成化丙戌進士改翰林庶吉士受業劉文安公

未嘗不掩卷而歎何也夫法者如衡之平不可以人
主意嚮而爲之重輕今觀邦鎮公爲廷尉時平反執
奏與釋之所對奚異使用法者皆若是則天下焉有
冤民哉

都察院右副都御史張公誥神道碑銘

顧清

張在宋爲汴人南渡時始遷於杭再徙華亭華亭之
張故爲著姓公之族家霍城書院西時呼爲鶴城張
云高祖元亨曾祖天祐祖仲清並有令名晦迹田里
考遜字時敏讀書善吟與陸夢菴潤玉王雪航公佩
等爲詩社十友著在郡牒妣余氏有賢行實生公諱
誥字汝欽幼而簡重不與羣兒伍少長銳志於學爲
文章操筆輒成見者歎異以府學生領天順己卯鄉
薦登成化丙戌進士改翰林庶吉士受業劉文安公

士不稱當黜不
廩當停

定之爲公所器許戊子拜監察御史巡視長蘆鹽場
平時豪猾倚權勢作姦罔利者悉裁以法諸場爲清
甲午按湖廣吏有望風自引退者監鄉試選舉得人
所錄文至今以爲式諸生坐歲考弗稱有停廩踰年
者公謂不稱當黜不當停其廩移文所司以爲非
朝廷制所司懼卽爲改正其移文諸司亦板行之丁
酉陞廣東按察副使巡督海道鄉人有鬪番商越境
牟利者公嚴爲之禁其弊遂絕丁內外艱服闋改四
川陞按察使弘治初蜀上連饑公請於朝停荆襄岳
武等衛運得米二十餘萬石又發廣濟庫銀易米數
十萬石隨所在貯之委廉能吏計口支給又倣韓魏
公及朱子法十步一竈爲糜粥以食老穉之不能自
食者所全活不勝計蜀人德之陞貴州左布政使閱
帑藏得羨銀數萬兩有以利動公者公正色曰此民
之脂膏可以自私邪命吏著之籍爲賑濟備言者愧
服陞都察院右副都御史巡撫雲南雲南去闕庭遠
積有疑獄至十餘年不決公原其情爲剖析言於
上悉見宥免竹子諸山箐夷羅構亂劫掠爲民害或
請以兵五路進勦者公止之曰彼爲盜豈本心迫饑
寒耳村寨固有良民今加兵玉石俱碎非撫綏意乃

自爲文選吏爲夷民信服者分持往論之降者相屬前後以千數餘黨各散去竟不煩兵而罷木邦孟密相讐殺諭之弗聽聽輒復反公曰此非可以口舌勝也檄諸道各練兵積粟爲必討計二虜始懼而自戢朝廷嘉公功有綵幣銀牌之賜益公之臨事伸縮卷舒文武並用有如此者以年及思休累上乞骸之疏戊午冬得請來歸監軍總兵而下盛供帳餞於數十里外且出白金爲贖公皆不受咸歎息而返閒居十三年治丘壠葺廬舍教子姪讀書爲身後計親戚之貧者衣食之故舊之失所者拯濟之鄉隣有疾病死喪而不給者周卹之蓋其不盡施而及於棄梓者又如此生宣德癸丑卒正德辛未年七十有九

焦太史編輯國朝獻徵錄卷之六十終

圖

